

山川典第四十卷

霍山部彙考一

中鎮霍山

霍山卽禹貢岳陽周禮冀州鎮也在今山西平陽府境內壓霍州及趙城岳陽靈石沁源四縣地其山因地立名不一在霍州爲金鞍嶺聖佛崖在岳陽爲蓮花山黨家山在沁源爲紫金山而在霍州亦在趙城者又爲觀塏峯山在霍州在靈石者又爲蛤蟆嶺要其支麓所分也歷代有勅祭今稱中鎮焉

觀地峰


休耕寺

興唐寺

中鎮廟



中鎮霍山圖



考

按書經夏書禹貢既修太原至于岳陽

蔡傳

廣平曰原今河東路太原府也岳太岳也周禮職方冀州

其山鎮曰霍山地志謂霍太山卽太岳在河東郡彘縣東今晉州霍邑也山南曰陽卽今岳陽縣地

也

按周禮夏官職方氏河內曰冀州其山鎮曰霍山

注

霍山在彘陽一云在霍州

訂義

易氏曰漢志河東

郡彘縣霍太山在東唐及今晉州霍邑本漢彘縣霍山一名太岳在縣東三十里

按爾雅釋地西方之美者有霍山之多珠玉焉

注

霍山今在平陽永安縣東北珠如今雜珠而精好

按山海經中山經牛首之山又北四十里曰霍山其水多穀有獸焉其狀如狸而白尾有鬣名曰鼬

鼬養之可以已憂

按漢書地理志河東郡彘

注

霍大山在東

按後漢書郡國志河東郡永安故彘陽嘉三年更名有霍大山

注

爾雅曰西方之美者有霍山之多

珠玉焉左傳曰閔元年晉滅霍杜預曰縣東北有霍大山史記曰原過受神人書稱余霍大山山陽

侯天吏也又蜚廉於山得石棺仍葬也

按晉書地理志平陽郡永安

注

故霍伯國霍山在東

按水經汾水注汾水東與羗水合水出東北太岳山禹貢所謂岳陽也卽霍太山矣上有飛廉墓飛廉以善走事紂惡來多力見知周王伐紂兼殺惡來飛廉先爲紂使北方還無所報乃壇於霍太山而致命焉得石棺銘曰帝令處父不與殷亂賜汝石棺以葬死遂以葬於霍太山有岳廟甚靈鳥雀不栖其林猛虎常守其庭又有靈泉以供祭事鼓動則泉流聲絕則水竭

按隋書地理志臨汾郡霍邑

注

有霍山有羗水

按地理通釋十道山川攷河東名山霍山職方冀州山鎮謂之霍太山在晉州霍邑縣東北三十里漢河東羗縣禹貢太岳岳陽

按明一統志山西山川霍山在霍州東南三十里接趙城界周爲冀州之鎮今爲中鎮

按山西通志山川霍山一名太岳在平陽府霍州東南三十里岳陽縣西北九十里南接趙城北跨靈石東抵沁源古爲冀州之鎮今爲中鎮其東有峯上圓名觀壘峯其山極高峻形勢巍然迴出雲

霄上有五色花雙頭蛇有中鎮廟靈應甚速凡遇災異遣官奉祀仍命有司例祭水經注曰岳廟甚靈鳥雀不栖其林猛虎常守其庭又有靈泉以供祭事鼓動則泉流聲絕則水竭 蓮花山在岳

陽縣北七十里霍山之支連峙七峯俱似蓮花蕊

觀堽峯山在霍山西形勢突兀上有神祠

金鞍嶺在霍州南十里唐太宗息馬卸鞍處

蛤蟆嶺在霍州東北五十里靈石縣西南五十里

以狀類名卽古賈胡堡相傳唐兵取霍邑嘗駐於此俗呼爲蚰子嶺

聖佛崖在霍州西南十五

里有古佛大小千餘

義城谷在霍州東南三十里中出水西流漑田

陶唐谷在霍州東

三十里帝堯避暑處

石鼻谷在霍州東五里許卽彘水之源中有朝陽洞鑾鈴原在霍州東十

里唐太宗過此掛鈴於樹上

鵠掌凹在霍山中卽妖蛛與龍鬬之所

紫金山在沁州沁源

縣縣城據其半自霍山蜿蜒而來高十餘里史記正義載霍太山南八十里爲沁源此其支龍也

按平陽府志山川霍山在霍州東南三十里

黨家山在岳陽縣北九十里霍山之支也

蓮

花山 語同通志

觀堽峯在霍州霍山西形勢突兀松柏蔚然上有宣貺真君祠卽遣趙襄子

朱書及爲唐太宗導兵克霍邑者後人集木於南麓將立廟夜聞有呼各村食牛聲至鷄鳴牛悉自

逸出久之復歸比晚視之前所集木盡移山巔矣土人卽廟禮祀

金鞍嶺 語同通志

蛤

蟻嶺在州東北五十里與靈石接界嶺勢巍巍屹立山表每日將暮羣阜深黑此嶺獨受返照青紫

萬狀綢采可觀

聖佛崖在霍州西南十五里汾水東岸

義城谷 語同通志

陶唐谷

在霍州東三十里帝堯避暑處水聲山色林峯環蔚四時皆可登眺

石鼻谷在霍州東五里許

卽彘水之源跨溪入谷行數里有朝陽洞風日凝聚冬不甚寒道人尙青山任素鉉相繼解脫於此

鑾鈴原

鵝掌凹

語俱同通志

按霍州志山川霍山在州東南三十里南接趙城北跨靈石東抵沁源古爲冀州之鎮今爲中鎮祠

在山麓歷代俱有祭碑並詩文

金鞍嶺在州西十里通志載金鞍勝跡卽此

觀壘峯

蛤蟆嶺

鑾鈴原

陶唐谷

義城谷

石鼻谷

聖佛崖

鵝掌凹

語俱同通志府

志 按州環繞皆山其名雜不可紀要皆霍山之麓也

彘水源出州南谷中西流溉田經城西入汾

霍泉發源霍山南麓分南霍北霍二渠以溉本州

趙城洪洞三處田

玉泉在陶唐谷半山間水出如玉因以爲名

圓泉在州東南十五里陰

地村引渠溉田入汾

馬跑泉在州東北四十里唐太宗馬渴甚以蹄跑地得泉因名時有杜十

萬者以餉師功求此泉爲己利遂賜之至今惟北莊得以灌溉云

羅頭泉在州東北三十五里

馮村泉溝南流灌田

打鼓泉在霍山泉自山頂而下注於地聲如播鼓故名

邢家泉在州

東北三里許引流灌田

章丘泉在州東十里丘家崖下散流入彘以灌田

龍池溝在州東

北三里泉流灌田上有龍王祠

方池在州南十五里郭莊村引渠灌田入汾

鴨底渠在州

東北三十里師家泉引以灌田

碧玉渠在州西北十里許村崖下引汾水灌田

官渠在州

東台大張等處水引流入城灌田

蟲蟲澗源出汾西縣東十里有淵逸真人祠流經城西南入

汾水聲如雷故名

按州縈迴皆水雜不可紀均之霍山之發源聚於汾以入河者也

景致霍嶽宿雲霍山高大爲州巨鎮每雲生其上卷舒變化莫可形狀一或凝而爲雨則山色益奇

州人恆以是爲雨徵

玉泉帝跡在陶唐谷山腰有泉昔堯避暑於此其水聲山色林峯環蔚四

時皆可登眺誠一郡奇觀也

觀壘靈應在霍山西上有宣貺眞君祠卽遣趙襄子朱書及爲唐

太宗導兵克霍邑者後人集木於南麓將立廟夜聞有呼各村食牛聲至鷄鳴牛悉自逸出久之復

歸比曉視之前所集木盡移山巔矣土人卽廟祀之每三月間遠近辦香走祭不絕 東嶺夕暉
在州東卽蛤蟆嶺屹立山表每日將暮羣阜深黑而此嶺獨受其返照錦霞綢采色象可觀斯亦奇
也

古蹟千里徑在州東三十里山下北齊封子繪修卽霍山神引唐太宗攻霍邑之路也中有土橋太
宗至此橋斷不能渡乃拜而禱之橋遂湧出舊痕皆向上今形迹微存 陵墓南北朝夏王赫連
勃勃墓在州東南五十里霍山之上其地多奇卉

祠宇中鎮廟在州東南五十里霍山麓唐初建明洪武正神號御製增建東西廊房并官廳國有大
事則差官致祭嘉靖三十六年知州褚相重修題扁曰中鎮霍山神廟 中鎮行祠在城宣四里

洪武八年同知呂稷建嘉靖二十七年知州陳嘉言以東嶽廟改建在宣一里 二郎廟在觀墪
峰唐初建宋崇寧中加號宣貺眞君感應如響四方多供奉焉 避暑宮在城東南五十里霍山

高峯夏王赫連勃勃墓卽在此 帝堯祠在霍山陶唐谷相傳爲帝堯避暑於此後建玉泉寺嘉

靖三十六年知州褚相改建爲堯祠肖象題扁爲文致祭後春秋爲例焉 玉泉寺在陶唐谷下

有玉泉故名宋初建明正德四年增修嘉靖元年重修今改建堯祠仍存佛像於後霍山書院年久傾圯止存地基 賜谷塔在南山巔嘉靖四十二年知州李春爲振起儒風創建

按岳陽縣志山川霍山在縣西北九十里謂中岳又謂太岳爾雅曰西方之美者有霍山之多珠玉焉明洪武間勅建中岳廟祀中岳霍山之神

按趙城縣志山川霍山之東有觀壘峯去縣東北四十里其山高峻入山五里許有中鎮廟唐開元八年封霍山中鎮爲應聖公宋政和二年封應靈王元封崇德應靈王至明改稱中鎮霍山之神靈應甚速凡遇災異遣官奉祀仍命有司例祭至者未嘗不題咏云廟東南有興唐寺東十里有休糧寺又向南有廣勝上下二寺 按靈石縣志所載蛤蟆嶺沁源縣志所載紫金山語俱同通志府志霍山部彙考二

陶唐氏

帝堯時舜居攝封霍爲鎮

按書經舜典肇十有二州封十有二山

蔡注

封表也每州封表一山以爲

一州之鎮

按路史後紀帝舜有虞氏以四仲巡四守至於方岳燔望告至秩山川覲四方羣后

問百年而見之定八伯之樂中祀大交霍山貢夏伯義伯之樂

按霍州志虞舜肇十二州冀爲

諸州首封霍爲鎮後始州焉

隋

文帝開皇十四年詔立中鎮霍山祠

按隋書文帝本紀不載

按禮儀志開皇十四年閏七月詔

冀州鎮霍山就山立祠並取側近巫一人主知洒掃並命多蔣松柏其霍山雩祀日遣使就焉

開皇十六年詔修霍山祠

按隋書文帝本紀不載

按禮儀志開皇十六年正月又詔晉州霍山

鎮修造

唐

元宗天寶十載加霍山封號遣官致祭

按唐書元宗本紀不載

按冊府元龜天寶十載二月己

亥分遣潁王府長史甘守默祭霍山應靈公

按文獻通考天寶十載封霍山爲應聖公

宋

太祖乾德六年有司請祭中鎮霍山

按宋史太祖本紀不載

按圖書編乾德六年有司言祠官

所奉止四岳今按祀典請祭南岳及五鎮祭中鎮霍山於晉州

太宗太平興國八年定中鎮霍山常祭日 按宋史太宗本紀不載 按禮志太平興國八年祕書監李至言按五郊迎氣之日祭五方岳鎮海瀆自兵亂後有不在封域者遂闕其祭國家克復四方間雖奉詔特祭未著常祀望遵舊禮就迎氣日各祭於所隸之州長吏以次爲獻官其後土王日祀中鎮霍山於晉州

徽宗政和三年改封霍山爲王 按宋史徽宗本紀不載 按禮志霍山舊封應聖公政和三年封應靈王

金

世宗大定四年封霍山爲應靈王定以每歲奉祀 按金史世宗本紀不載 按禮志大定四年禮官言岳鎮海瀆當以五郊迎氣日祭之詔依典禮季夏土王日祭中鎮霍山於平陽府其封爵並依唐宋之舊明昌間從沂山道士楊道全請封霍山爲應靈王每歲遣使奉御署祝版齋齋乘驛詣所在郡邑長貳官行事

元

世祖中統二年定以中鎮爲西道 按元史世祖本紀不載 按祭祀志岳鎮海瀆代祀自中統二

年始凡十有九處分五道後乃以中鎮爲西道

至元三年定中鎮祭日 按元史世祖本紀不載 按祭祀志至元三年夏四月定歲祀嶽鎮海瀆

之制六月中鎮土王日祀霍山於平陽府界

明

太祖洪武三年正霍山稱號 按春明夢餘錄洪武三年夏六月始正嶽鎮海瀆及各城隍等稱號

稱霍山爲中鎮霍山之神

洪武七年定中鎮霍山於山西平陽府祭 按明會典云云

洪武二十八年征廣西告祭霍山 按霍州志云云

成祖永樂 年征安南告祭霍山 按霍州志永樂時征安南祭中鎮霍山文云今年七月十六日

兵行特遣人致香幣牲醴先詣神所祭告

代宗景泰元年遣使祭霍山 按霍州志景泰元年歲次庚午閏正月丙午朔越十五日庚申遣吏科給事中喬毅致祭中鎮霍山

景泰六年遣使祭霍山 按霍州志景泰六年遣都察院右僉都御史蕭啟禱祀霍山

武宗正德六年遣使祭霍山 按霍州志正德六年遣山西等處承宣布政使司右叅政夏景和祭告於中鎮霍山

世宗嘉靖十一年遣使祭霍山 按霍州志嘉靖十一年遣平陽府霍州知州王子謹致祭於中鎮霍山

嘉靖三十三年遣使祭霍山 按霍州志嘉靖三十三年遣提督鴈門等關兼巡撫山西地方都察院右副都御史王崇祭告於中鎮霍山

嘉靖三十五年遣使祭霍山 按霍州志嘉靖三十五年遣戶部左侍郎鄒守愚致祭於中鎮霍山
嘉靖四十年遣使祭霍山 按霍州志嘉靖四十年歲次辛酉八月戊午朔越十日丁卯遣提督鴈門等關兼巡撫山西地方都察院右副都御史楊宗氣致祭於中鎮霍山

霍山部彙考三

皇清

康熙六年

按霍州志康熙六年九月

欽差兵部左侍郎曹國柄致祭於中鎮霍山之神

霍山部藝文一

中鎮霍山廟記

元劉祁

九州皆有山必以其魁碩偉傑者爲鎮謂其能蒸雲洩雨障蔽固圉繫民望而安地德也故其神必廟其廟必爵有天下者以時舉禮典遣使薦享祝文自署名惟謹所以崇祭祀之儀昭誠敬之道交於神明以祈景福周禮職方氏載九州之鎮山在揚曰會稽在荆曰衡在雍曰華在豫曰嵩在兗曰岱在青曰沂在并曰恆在幽曰醫無閭在冀曰霍名於後世不可易惟冀州據北方地最曠邈河東尤稱山水之雄而獨以霍爲鎮意在其巍大隆峻深厚廣博子諸峯而隸羣垤其氣象有以冠境內

余嘗見晉人談其山跨趙城絡洪洞瞰平陽而萃秀於霍邑東北橫壓汾流與太行接遠而望之如
亂屏如列壘巖巖峯聳撐九霄納三光岌岌凜凜掩歷山而吞吐射矣神之廟侈於唐貞觀間歷代
增修爵則先公後王公曰應聖王曰應靈起唐開元訖宋政和益著朝家以時祭不少缺邑人奔走
奉事儀物爛然其靈應隨感而有蓋不可殫紀金貞祐之亂河東河朔名山大川神祠無不灰燼瓦
爍一空是廟也巋然獨存可謂異矣特其年深歲久摧頽罅漏日就湮廢里翁邑士跂盼矚咨是則
崇飾汎掃之力其待人歟惟中書省左右司郎中李侯禎一旦謂其府官張仲良暨僚吏曹經曰茲
吾鄉標望四海所知而坐視荒寂顏實有覩遂乃發財募工相與經營由之達官貴人及浮屠道士
之有識者同聲趨應風動雲委輦木於山陶甃于地市丹碧于四方喘汗供給莫之敢慢蓋經始于
壬寅之四月逮仲秋畢工於是椽之腐折者完瓦之缺碎者易壁之傾圯者圻棧之雜駁者一華棖
文柱煥然一新啟帷幕拭珠埃而神像儀衛整整皆有生氣若欲起立邦人過客瞻拜奠酌加肅敬
而山之雲煙草木亦皆改容動色蔚乎爲一郡之光亦可壯也時余在安陽聞之恨未得一謁而李
侯書來曰今茲廟事告成鄉人父老皆欲刻文于碑誠得吾子筆爲幸繫官戎行不得走請于門惟